

يا صاحبي الغربية

مابين البدايه ومسك الختام
حكاوي وكلام
مواقف تضحك وغيرها تغم
مواقف رجوله وحاجات نص كم
ومين اشتراي ومين باع بكام
فقبل اما نحكي
هنبدأ كلامنا صلاتاً سلاماً
على من هيشفع وخير الانام
(يا صاحبي الغربية)
إني رأيت الدمع قد بل اللحي
ولقد علمت الدمع من شيم الرجال)
شيم اللي فاتوا أهلهم لجل اما ياكلوها بحلال

شيم اللى عمره مابكى قبل اما يتغرب
فأضطر يهرب م الكلام للصمت
و اضطر يرجع للسجاير بالعلب مش فرط
كان كل يوم يتوضى دايم بالدموع
من اجل سادس فرض
كانت مكالمه لمصر
كان قبلها تايه و بعدها مندوه
بس انتوا خففتوا الوجع و التوهه و الاحمال
يا صحابي يا اجدع عيال
مشوفتش في خيركم عليا الحلال
(ورأيت مالاً قد نفذ
في منتصف شهرٍ كئيب
و أتتنا ايام عجاف)
ولا عمر واحد فينا خاف
كانت كتافنا ف كتف بعض
نتعشى بالضحكه اللى جايه بالدموع
بس المهم نسد جوع

يا صحابي يا ولاد الضلوع
يا اخوات شقايق
راضعين م البكا على بعض
لازم نصبر بعض
الغربة دايمًا هدد / و احنا تلاته العدد
فكنتوا ليا المدد
انتوا الحطيان و الارض
لو كان معانا نبعزق
و نفتري في الصرف
و اول ما نعلن فلس
ان شالله كنا نموت
لجميع جميع المنتجات
كنا نغض الطرف
ونتجه للشاي و القهوة و البسكوت
يا صاحِبِي الغربة ..
إني رأيت في غربتي معكم حياة
والغربة موت